

Vun driweriwer

erscheint auf www.lenauheim.de

monatliche
Erscheinung

Juni 2023

von *Helen Alba*

Aus unsrer Schulzeit

Ellebooe-Schitzer

Wie mer in de Unerklasse ware, bei der Lehrerin Anna Hammes, han mir Mädle die schwarz-weiß karierti Uniforme anghat un derzu schwarzi Scherzer. Die han runderum Schampodle ghat un unser Mutter hat oft gschennt, weil sie ware schwer zu biegle. Separat hat zu dere Uniform noch e weiss Scherz gheert, natierlich mit Schampodle. Die Scherz han mer nor an Feiertäch angezoo. Des heescht am Mutter- un Kinnertach, wann mer Programm gin han oder abghol gin sin. Un ich han mich erinnert, des Uniformkleid war langärmlich. Un mer is doch als Schillerin vill mit de Ellbooe uf dene Bänk rum hin un her geritscht, manchmol hat die Fillfeder Tinte laafe gelosst oder es is uf die Bank was ausm Butter- oder Lekwarbrot (Jausen) getripst. Dass mer sich nit so schnell dreckich mache soll, han mer selmols die schwarze Ellebooe-Schitzer uf Anrote unsrer Lehrerin getraa. Die ware aus Klott, sin iwer die Händ bis an die Ellbooe gezoo gin, han an alli zwaa Enner Gummi ingezoo ghat. Un heizutach kummts em zu lache, wann mer dran denkt.

Diktat schreiwe

Unser Hammes Lehrerin hat druf bstann, dass mer alli gut lese un Diktat schreiwe kenne. So hat se des dorchgesetzt, dass mer noh em Mittachesse vun de Internatler un vor Beginn vun unsrem Unerricht, alli im Esssaal zammkumme, for gemeinsam es Diktat-Schreiwe iewe. Un ich weess noch haargenau. Sie hat uns vill ausm Märchen „Die goldni Gans“ diktiert!

Ich han es Grimm-Märchenbuch in die Hand ghol un des Märchen dorchgelest. Dann sin ich ach drufkumm, for was mer aus dem Märchen Diktat gschrieb han. Es kummt alles drin vor, was kumpliziert is. Anfang natierlich vun der Gans (wahrscheinlich is die oft mit z am End gschrieb gin) bis hin zum doppelte m oder anre Mitlaute, lange ie, tz, ß, ck un vogelfau. Ja, so war des selmols.